



*Moyse ne pouuant endurer, qu'un Egyptien offençast vn Hebrieu, le tuë,  
& cache dans du sable; & s'enfuit en Madian.*

**M**OYSE estant paruenu en âge d'adolescence, fut fort aimé & chery de la fille du Roy Pharaon, laquelle le fit instruire és sciences humaines par les Mages Egyptiens. Or luy ayant sceu estre de nation Hebraïque, il luy prit enuie d'aller voir ses freres Hebrieux, qui estoient sous la tyrannie des maistres des œuures. Ayant donc considéré leur continuelle affliction, il vid vn Egyptien qui outrageoit sans occasion vn Hebrieu d'entre ses freres, ce qu'il ne pût souffrir; & ayant regardé çà & là, ne voyant personne, tua l'Egyptien, & le cacha incontinent dans le sablon. Le second iour d'apres il vint derechef voir ses freres Hebrieux, dont deux d'iceux quereloient l'un contre l'autre. Adonc Moyse dit à celuy qui auoit tort, pourquoy frapes-tu ton prochain? lequel répondant fierement à Moyse, dit: Qui t'a constitué Prince & Iuge sur nous? me penses-tu tuër ainsi que tu tuas hier l'Egyptien? Et Moyse eut crainte, disant en son cœur, Comment ce faict est-il conneu? Et peu apres le Roy Pharaon entendit ce cas; parquoy faisoit chercher Moyse de toutes parts pour le faire mourir. Mais il s'absenta du pays d'Egypte, & s'enfuit en la terre de Madian, éuitant par ce moyen la fureur du Roy Pharaon.

*Exode 2. Chap.*